

EM2017/40

17. oktober 2017

Michael Rosing, Attaviitsoq

Naalakkersuisut AIS19-imi ukiunilu missingersuusiorfiusuni misileraanermut aningaasaliissutinik 7,5 mio. kr-inik amerlassusilinnik, aalisakkanik suliffissuit nunaqarfinni qerititsivinnik sanaartornissamik annertusaanissamulluunniit atugassatut qinnuteqarfigisinnaasaannik immikkoortitsinissamik peqquneqarnissaat pillugu Inatsisartuni aalajangiiffigisassatut siunnersuut. Tapiissutit containerinik qerititsivinnik nutaanik pisinermut kiisalu aalisakkanik tunisasioffiit Nukissioffinnut attaviliinermut akiliutissaannut, containerinik qerititsivinnik pisinerup Nukissioffiit naammassisinnaasamikkut annertusaanerannut aningaasartuutitut akiliutitut atorneqarsinnaassapput. Aningaasanit atorneqartussanngortitanit agguaassinermi piffinni suliffissaqartitsinikkut suliniutinik pisariaqartitsinerit isiginiarneqassapput.

(Inatsisartunut ilaasortaq Peter Olsen, Inuit Ataqatigiit)

Siunnersuuteqartup siunnersuummi ajornartorsiutit taakkartugai paasisinnaavakka. Isumaqarpungali aaqqiissutissatut tikkuagaa eqqortuunngitsoq. Kalaallit Nunaanni aalisarnermut sinaakkutissat aalaakkaasut pisariaqartinneqarput aamma pisassiissutinik pigisanik piginnittuunermet aaqqissuussineq eqqarsaatigilluagaq. Sunaluunniit inissippat taava sinneruttut inissittarput apeqqutaallunili sumiiffinni assigiinngitsuni suut akilersinnaanersut.

Sualummik sinerissamut qanittumi aalisarneq tamanut paggatassiisarnermit artorsartinneqarpoq. Imaakkamimi siulliullutik takkuttut amerlanerpaanik pisaqartarlutik. Aaqqissuussineq pisassiinertaqanngitsoq eqqaassanngikkaanni tamanna aalisakkanik aqutsineruvoq ajornerpaarpaaq. Illuatungaaniippoq pisassiissutit tamarmik inunnik pigineqartut, taaneqartartoq IOK system assigiinngitsunik ajornartorsiutitaqartoq. Assersuutigalugu iluanaarniapilunnissaq tunngavilerneqartarpoq pisassiissutillu inunnit ikittuaraannarnit pigineqalertarlutik.

Aqqutit pingajoqarput piginneqatigiilluni illuuteqarnermet eqqaanarsinnaasumik. Taaguuteqarpoq piginneqatigiilluni pisassiissutinik ingerlatseqatigiiffik. Piginneqatigiilluni pisassiissutinik ingerlatseqatigiiffeqarnermet eqqarsaat kiisalu nunaqarfinni tamani illoqarfinnilu tamani pinngitsoorani najukkap eqqaaniittut pisuussutit ilaannik pisassinneqartarnissamik piumasaqartarnissaq ataqatigiisikkaanni taava aalisartoqalersinnaavoq pisuussutinik piginnittuuneq ima nukittutigilerluni allaat tunisasioffiit akissaqartinneqalerlutik aammali periarfissaqarluni aalisartut nutaat aalisalersinnaanissaat aningaaserivimmit milliunilikkaanik atorniaqqaanngikkaluarlutik. Aqqut tamanna atuallattariaqaraluarparput najukkami ajornartorsiutit assigiinngitsut Inatsisartut oqaluttarfianiik aaqqinniaaluusaartaqattaarunnaarlugit.

Taamatut tunngavilersuuteqarlunga siunnersuummut qujavunga, inassutigalugululi itigartinneqassasoq.

